

每週經課朗誦經文(巴克禮漢羅/教羅)2013/06/30

共同經課 - 1 列王記下二章一節~二節, 六節~十四節

1 耶和華 beh 用捲螺風接以利亞上天 ê 時, 以利亞 kap 以利沙 tùi Kiat-kah 去。2 以利亞 kā 以利沙講, 你請 tiàm chia, 因為耶和華差我去 Pek-ték-lī。以利沙講, 我 kí 永活 ê 耶和華, kap 你 ê 活命來 chiù-choā, 我無 beh 離開你; 兩人就落去 Pek-ték-lī。6 以利亞 kā 以利沙講, 你請 tiàm chia, 因為耶和華差我去約旦。以利沙講, 我 kí 永活 ê 耶和華, kap 你 ê 活命, 來 chiù-choā, 我無 beh 離開你。In 兩人就相 kap 去。7 有先知 ê 學生五十人去, 遠遠 khiā tī in ê 對面; 兩人 tī 約旦河邊 teh khiā。8 以利亞 thèh 伊 ê 外衫捲起來, phah hiah-ê 水, 水就分雙 pêng; 兩人行乾地過去。9 過去了, 以利亞 kā 以利沙講, 我 iáu 未受取離開你去, 我 beh kā 你做甚麼? 你 taⁿ tiòh 求。以利沙講, 求你將感動你 ê 神 hō 我雙份。10 以利亞講, 你所求 ê, oh 得 ah; 總是我受取離開你 ê 時, 你若看見我, 就 beh 得 tiòh; 若無, 就 boē 得 tiòh。11 In teh 行 teh 講, 忽然有火車火尾, 隔開 in 兩人; 以利亞就坐捲螺風上天。12 以利沙看見, 就叫講, 我 ê 父 ah, 我 ê 父 ah, 以色列 ê 戰車 kap 伊馬兵 ah。後來無 koh 看見伊; 就 thèh 家己 ê 衫來拆做兩 pêng。13 伊拾以利亞 ka-láu 落來 ê 外衫, tò-tng 去 khiā tī 約旦河邊。14 伊用以利亞 ka-láu 落來 ê 外衫 phah 水, 講, 以利亞 ê 上帝耶和華 tī toh 落? phah 水了後, 水就分雙 pêng; 以利沙就過去。

共同經課 - 2 詩篇七十七篇一節~二節, 十一節~二十節

1 A-sat ê 詩, 照 Ià-tō-tùn ê 做法; 交 hō 樂官。1) 我 beh 對上帝出聲求叫; 我對上帝出聲, 伊 beh àⁿ 耳孔聽我。2 Tī 我患難 ê 日我 chhē 主; 我 tī 暝時 kiáh 起手無停, 我 ê 心 m̄ 肯受安慰。11 我 beh 講起耶和華 ê 所行, Siàu 念伊早時 ê 神跡。12 我 beh 忖度你 ê 所行, 靜靜想你 ê 所做。13 上帝 ah, 你 ê 路是聖 ê; 有甚麼神明大親像上帝? 14 你是行奇事 ê 上帝; 你 bat tī 萬百姓 ê 中間, 顯明你 ê 權能。15 你 bat 用你 ê 手贖回你 ê 百姓, 就是雅各 kap 約瑟 ê kiáⁿ 孫。[Sè-làh]16 上帝 ah, chiah-ê 水見 tiòh 你, Chiah-ê 水見 tiòh 你, lóng 驚惶, 深淵亦 ngiàuh-ngiàuh-chhoah。17 密雲 piàⁿ 出水, 穹蒼出聲, 你 ê 箭四界射。18 Tī 捲螺風內有你雷 ê 聲; Sih-nà ê 光 sih 到 thong 世間; 地 ngiàuh-ngiàuh-chhoah, koh 振動。19 你 ê 道路 tī 海中, 你 ê 路徑 tī 大水中, 你 ê 腳跡無人能知。20 早你用摩西亞倫 ê 手, Chhoā 你 ê 百姓親像羊群。

共同經課 - 3 加拉太書五章一節, 十三節~二十五節

1 基督 tháu 放咱做自由, 所以 lín tiòh khiā 在, 莫得 koh 掛 tiòh hit-ê 做奴僕 ê 擔。13 兄弟 ah, lín 受召是來得 tiòh 自由; 獨獨莫得用自由做肉體 ê 機關, 是 tiòh tùi 仁愛相服事。14 因為全律法包含 tī 一句, 就是講, 疼厝邊親像家己。15 設使 lín 相吞咬, 驚了會相滅無; lín tiòh 謹慎。16 Taⁿ 我講, lín tiòh 照神來行, 就無成肉體 ê 私慾。17 因為肉體 ài 攻擊神, 神 ài 攻擊肉體; 兩個相對敵, hō lín 無行所 ài 行 ê。18 獨獨 lín 若 hō 聖神所引 chhoā, 就無 tī 律法下。19 Taⁿ 肉體 ê 品行有露現, 親像姦淫、污穢、邪癖、20 拜偶像、邪術、結冤仇、相爭、怨恨、受氣、結黨、分 pêng、異端、21 怨妒、酒醉、放蕩, 以及親像 chit 號 ê; 我前 bat 事先講, taⁿ 也事先 kā lín 講, 見若常常行 án-ni ê, 將來無承接上帝 ê 國。22 但是聖神 ê 果子就是仁愛、歡喜、和平、23 吞忍、慈悲、善良、忠信、溫柔、擲節; 親像 chit 號, 無有律法禁伊。24 Koh 屬基督耶穌 ê 人 bat 將肉體, kap 伊 ê 前伊 ê 慾, 釘 tī 十字架。25 咱若照神來活, tiòh 照神來行。

共同經課 - 4 路加福音九章五十一節~六十二節

51 耶穌受 chih 接上天 ê 日期 beh 到, 就決意 òng 耶路撒冷來行, 差使者做頭去; 52 in 去入撒馬利亞人一個鄉社, beh kā 伊備辦。53 但是 in m̄ 接納伊, 因為伊 òng 耶路撒冷 teh 行。54 伊 ê 學生雅各約翰看見 án-ni, 就講, 主 ah, 你 ài 阮叫火 tùi 天落來滅 in mah? 55 耶穌 oát-tng 身責備 in。56 大家就去別個鄉社。57 In 行路 ê 時有人 tùi 耶穌講, 你無論 tá-lòh 去, 我 beh tè 你。58 耶穌 kā 伊講, 狐狸有孔, 天中 ê 飛鳥有巢; 獨獨人子無 khoà 頭殼 ê 所在。59 Koh 對一人講, Tè 我。Hit 人講, 主 ah, hō 我 tò 去, 先埋葬我 ê 老父。60 耶穌 kā 伊講, chhut-chāi 死人埋葬 in ê 死人; 但是你 tiòh 去傳報上帝 ê 國。61 Koh 一人講, 主 ah, 我 beh tè 你; 總是准我先去 kap 家內 ê 人相辭。62 耶穌對伊講, 見若手 hoāⁿ 犁尾來看後面 ê, 無合 tī 上帝 ê 國。